



UPA 15/92
Nuuk 18. marts 2015
Naaja H. Nathanielsen

Uunga siunnersuut: Suliffeqarnermi innersuussisarneq il.il. pillugit Inatsisartut inatsisaata nr. 5, 8. juni 2014-imeersup allanngortinnissaa pillugu Inatsisartut inatsisaat nr. xx, yy 2015-imeersoq

(Inuussutissarsiornermut, Suliffeqarnermut, Niuernermet Nunanullu allanut Naalakkersuisoq)

Inuit Ataqatigiinniit siunnersuutip siunertaa tapersorsorparput. Suliffissaqanngitsut pillugit ilisimasaqarnitta annertusarneqarnissaannut aammalu avataaniit sulisussanik tigusiinnarnata atorfiit nunatsinneersunik inuttalersorneqarnissaannut pikorinnerusariaqarpugut.

Naalakkersuisut nuna tamakkerlugu suliffinnut nittartakkamik, suliffeqanngitsullu CV-minnik ilisiffiginnaasaannik siunnersuuteqarput. Taamaasillutik kommunit sulisitsisullu sulisussatut pisariaqartinneqartunut sumi piukkunnartoqarnerseq ajornanngitumik takusinnaalissavaat.

Inuit Ataqatigiinniit ingerlassamut matumunnga qularnartitaqarpugut, taamaattumillu Inuussutissarsiornermut Ataatsimiititaliaq tusarniaanermi akissutinut tamanut eqqumaqqissaqquneqarpoq. Oqareernitsit siunertaanut isumaqataavugut. Inuit Ataqatigiinnilli siunnersuutip ilumut atuuffissamisut atuunnissaa pingaartipparput, imaangitsoq kommuneni pappiliarsornerup annertuseriarneranik kinguneqaannassasoq. Suliffissaqanngitsut CV-iminni piginnaasaminnik allattuinnissaat ajunngivippoq. Tamannali kisiat tunaartarineqassanngilaq. Nassuerutigisariaqarparput suliffissaqanngitsut ilarpassui CV-mi piginnaasaminnut allattuinnissaminnut ilinniagaqarnikkut tunngavissaqarneq ajormata. Taamaattumillu suliffissaqanngitsut piginnaasavimmikkut kissaatimikkullu nassuiaanissaat taamatulli pingaartigaaq. Aammalu suliffissaqanngitsut peqatigalugit iliuusissatigut pilersaarusiunnissaat aamma pingaaruteqarpoq. Taamaangippammi pappiliaannaassaaq – suliffittaqqanngitsoq.

Taamatullu periarfissaasut malittarisassallu piusut eqqarsaatigalugit siunnersuutip ataatsimiititaliamit qimerloorneqarnissaa kaammattuutigaarput. Taamatut oqarluta siunnersuutip ataatsimiititaliamit suliarineqarnissaanut ingerlateqqipparput.